

6 Die erste Predigt vom H. Abendmal

gab / sprechen sie / das gesegnete Brot seinen Jüngern / vnd sprach: Esset / 22. Er gab ihnen auch den gesegneten Kelch / vnd sprach: Trincket alle daraus. Da hören wir / er hats seinen Jüngern zum besten eingesetzt. Das sind aber nicht allein die zwölff Apostel / denn er hat sie für sie allein nicht gelitten / sondern für alle arme Sünder / die sich seines tewren verdienstes mit warem glauben annemen vnd trösten / der H. Er hat vnser aller sünd auff ihn geworffen / vnd er ist die versöhnung für der ganken welt sünde / Wie er nun für alle sein Leib gegeben vnd sein Blut vergossen hat: Also ist ihnen auch allen ins gemein dis Abendmal zu trost eingesetzt / denn wie viel ihr getaufft sind / die haben Christum angezogen / da ist kein Jüd noch Griech / kein Mann noch Weib / kein Knecht noch Freyer / sondern sie sind allzumal einer in Christo Jesu. Wer auff Christum getaufft ist / gleubt dem Euangelio in kindlicher einfalt / befließiget sich eines Gottseligen Christlichen wandels / liebet seine Mitbrüder vnd Mitschwestern / vnd folget dem H. Erren Christo gedültig nach vnter dem liebē Creutz / der ist sein Jünger / er sey sonst Geschlechts / Ampts / oder stands halben wer er wolle / Priester oder Ley / hoch oder nider / Sol derwegen von diesem heiligen Freudenmal niemand der es begert / vnd der alters vnd verstands halben dazu geschickt vnd tüchtig ist / außgeschlossen werden / vnd sol ohn alles ansehen der Person / einem wie dem andern / dem Priester wie dem Leyen / dem Leyen wie dem Priester das ganze vngestümmelte Abendmal gereicht werden. Denn das der Papst wider die helle dürre wort Christi / Trincket alle daraus / den armen Leyen den Kelch enkeucht / vnd allein seinem beschornen verlornen hauffen das ganze Abendmal gönnet / auff das daraus die hoheit / präeminenz vnd würdigkeit des vermeintten geistlichen stands erschen werde: das hat er nicht macht / es ist ein hochuerweißlich sacrilegium vnd Kirchenraub / das mit er

Qui sint
Christi disci-
puli.
Esa. 53.
1. Iohan. 2.

Gal. 3.

Sacrilegium
Papæ.

mit er